

## “IV EDICIÓN DO PREMIO “PONTEAREAS, LINGUA E EMPRESA” BASES

### Primeira. Obxecto

A convocatoria do Premio “Ponteareas, lingua e Empresa”, do Concello de Ponteareas, ten como finalidade promover o uso da lingua galega na actividade económica do Concello de Ponteareas, estender o seu uso nas relacións laborais, comerciais e empresariais, e recoñecer publicamente a contribución ao aumento e mellora do uso social do galego desde este sector.

A Lei 3/1983, do 15 de xuño, de normalización lingüística recolle no seu artigo 25 que o Goberno galego e as corporacións locais dentro do seu ámbito fomentarán a normalización do uso do galego nas actividades mercantís, publicitarias, culturais, asociativas, deportiva e outras.

Estes premios están dirixidos a un fin cultural, competencia que en materia de promoción da cultura teñen os municipios, segundo o artigo artigo 25.2.m da Lei 7/1985, do 2 de abril, reguladora das bases de réxime local, que atribúe ao municipio as competencias propias en materia de promoción da cultura e equipamentos culturais.

### Segunda. Destinatarios/as

Poderán ser destinatarios deste premio as empresas, autónomos, profesionais, ou outro tipo de negocio, así como as persoas que destacasen ou destaquen polo uso do galego na actividade económica, e que teñan a súa sede social ou un centro de actividade económica no concello de Ponteareas.

### Terceira. Méritos que se valoran

Valorarase o uso da lingua galega na actividade empresarial en todo o que teña que ver coa comunicación externa ou relacional e coa interna ou de xestión, así como o ámbito de influencia ou impacto da actividade.

En concreto, terase en conta o seguinte:

#### A. Comunicación externa ou relacional

- Sitio web, se o tivese.
- Redes sociais, se as tivese.



- Sinalética e comunicación.
- Campañas publicitarias ou materiais promocionais en calquera soporte .
- Uso habitual do galego nas súas actividades e nos seus servizos.
- Atención habitual á clientela e ao público en xeral.
- Calquera outro mérito que se poida salientar.

#### B. Comunicación interna ou de xestión

- Comunicación interna co persoal ou entre os diferentes departamentos, se os houberse.
- Existencia de normas de usos lingüísticos que fomenten o uso do galego e a diversidade lingüística.
- Calquera outro mérito que se poida salientar

Tamén se terá en conta o ámbito de influencia ou o impacto que a actividade poida ter en sectores especialmente relevantes para o proceso de normalización lingüística.

### **Cuarta. Premio**

Convócanse as seguintes categorías do premio:

- Traectoria do uso da lingua galega ao longo de décadas.
- Uso continuado da lingua galega
- Incorporación recente ao uso da lingua galega

Concederáse un premio por categoría.

O Premio “ Ponteareas, Lingua e Empresa”, do Concello de Ponteareas terá carácter de distinción pública e, polo tanto, materializaráse nunha figura exclusiva realizada polo escultor Silverio Rivas, sen que leve aparelado ningún beneficio económico.

Os premios serán entregados nun acto público ao que se lle dará difusión polos medios que o Concello de Ponteareas acorde.

### **Quinta. Orzamento dos premios**

O orzamento total dos tres premios ascende a 2.343,00 euros, con cargo á partida orzamentaria 2023 / 0 / 33400 / 4790200 / 01 do orzamento do ano 2023 do Concello de Ponteareas.

### **Sexta. Información sobre empresas que empregan o galego**



Calquera persoa, entidade ou empresa poderá achegar información sobre empresas, autónomos, profesionais ou outro tipo de negocio, así como sobre persoas que destacasen ou destaquen polo uso do galego na actividade económica, e que teñan a súa sede social ou un centro de actividade económica no concello de Ponteareas, que considere que poidan ser destinatarias destes premios. Para tal fin, deberase enviar un correo electrónico ao enderezo [premioslinguaempresa@ponteareas.gal](mailto:premioslinguaempresa@ponteareas.gal), no que se achegará unha ficha de información, que estará dispoñíbel no web [www.ponteareas.gal](http://www.ponteareas.gal). O prazo de presentación desta información abranguerá desde o día seguinte á publicación destas bases no taboleiro de anuncios electrónico do Concello e na páxina web do Concello de Ponteareas e ata o día 20 de marzo de 2023. Xunto coa ficha de información, deberase achegar a fotocopia do DNI da persoa que envía a información.

### **Sétima. Xurado**

O xurado, ademais de propor as candidaturas que considere, terá en conta a información recibida sobre calquera empresa, autónomo, profesional, outro tipo de negocio, persoa ou entidade que empregue a lingua galega na súa actividade económica., e efectuará a proposta de resolución de concesión do premio, de acordo coa finalidade deste, e poderá deixalo deserto na súa totalidade ou nalgunha das categorías.

O xurado será nomeado pola Alcaldía do Concello de Ponteareas e a súa decisión será inapelábel.

A composición do xurado publicarase con anterioridade á súa primeira reunión no taboleiro de anuncios electrónico do Concello e no sitio web municipal.

En caso de ausencia dalgunha persoa integrante do xurado, poderá ser substituído por outra persoa que para o efecto designe a Alcaldía.

O xurado queda facultado para interpretar as presentes bases e resolver sobre aspectos non recollidos nestas bases.

O premio poderá quedar deserto na súa totalidade ou nalgunha das categorías.

### **Oitava. Resolución do premio**

O xurado formulará unha proposta de resolución do premio, debidamente motivada, e será posteriormente a alcaldesa o órgano competente para resolver o procedemento, de acordo coa antedita proposta de resolución do xurado. A decisión será inapelábel.

### **Novena. Publicidade**

Estas bases publicaranse no taboleiro de anuncios electrónico do Concello de Ponteareas e no sitio web municipal.



Todas as publicacións posteriores á publicación destas bases faranse no sitio web municipal.

### **Décima. Protección de datos**

De conformidade co Regulamento xeral de protección de datos 2016/679 do Parlamento Europeo, do 27 de abril de 2016, e da Lei orgánica 3/2018, do 5 de decembro, de protección de datos persoais e garantía dos dereitos dixitais, os datos persoais obtidos serán incorporados a un ficheiro responsabilidade do Concello de Ponteareas cuxa finalidade é a xestión do presente premio. Poderanse exercer os dereitos de acceso, rectificación, limitación do tratamento ou calquera outro establecido na normativa vixente mediante un escrito dirixido ao Concello de Ponteareas.

Documento asinado á marxe polo concelleiro de Lingua, Fernando Groba Bouza

